

天津政俗沿革記卷十四

防禦

綠營 團勇 洋槍隊 協 巡防營 水師 海軍

練軍 常備軍

混成軍 械製造

易曰王公設險以守其國詩曰禦其外侮有國者防禦之道固古今所同尙矣天津襟帶渤海屏蔽京師是以天津鎮總兵設於順治元年駐天津並設分防外汛各營是爲綠營之始然皆以土著人充之歲久而窳或不堪戰陣咸豐閒粵匪之亂長蘆運使楊需會同在籍仕紳招募勇丁由蘆商按引指交練勇之費是曰蘆團同治元年以捻匪之亂天津增設洋鎗隊其後直隸總督

卷十四

一

劉長佑曾國藩始倡議練兵之制劉開之於先而曾繼之於後而國家經制之兵乃日變矣同治九年李鴻章督直隸益增練軍庚子亂後袁世凱督直隸裁綠營兵餉以贍常備軍時國家已立陸軍之制而各省巡防營亦同時並重迄宣統閒陳夔龍遵議裁撤綠營則綠營蓋罕有存焉者矣警察之設以光緒二十八年承庚子拳匪亂後直隸總督袁世凱以接收天津交替之際恐大兵之後人心浮動乃於保定先練警察三千人遠溯周禮司隸之遺制近仿各國警察之成規俾收回津地得以善其後焉考雍正閒天津舊有水師歷乾嘉道咸

旋裁旋復李鴻章奏請籌立北洋水師購英之鐵甲艦及水雷附以吾國閩粵之船成北洋水師艦隊翱翔洋海閒蓋吾國前此所未有也軍械製造局之設同治閒通商大臣崇厚創之於天津李鴻章復擴其舊而增其新用兵之道首重器械自道咸以降歐洲各國競以器法相耀月異而歲不同海陸交綏而強弱長短見焉夫自同光以來勞臣籌策其因地勢敵情而變焉者不可以不紀也因舉清初及近世以來籌防之計備禦之策悉著之於篇

綠營 團勇 洋槍隊 練軍 常備軍 混成

卷十四

二

協 巡防營

清初天津綠營之制凡天津鎮總兵官一左營中軍游擊一中軍守備一千總二把總二右營游擊一中軍守備一千總一把總一城守營都司一千總一把總三天津鎮屬初設廿六營管轄馬步守兵五千八百八十一道光二十一年於本標裁兵二百三十三二十二年經直隸總督訥爾經額兩次奏增新兵四千七百統計凡新舊兵一萬零三百四十八大沽協副將一中右營以中軍都司兼攝中左營都司一千總一把總一前左營都司一前右營游擊一守備一千總一把總一後右營

都司一千總一後左營守備一千總一把總二咸豐八年海口左右六營增設每營帶隊官千總一把總一經制外委二額外外委四每營兵額三百不分馬步守缺以鎗礮爲正技撥練洋鎗隊八百洋礮隊八十另有官弁管帶分駐礮臺按日操練咸豐三年長蘆鹽運使楊霈以粵匪北竄各省舉辦團練因會同在籍官紳製造擡鎗五百桿款由蘆商岸引捐交凡練勇四百名後增練一百名共五百名統帶總帶幫帶官各一左右哨官十二俱候補武職其後光緒十年法粵之役二十年中日之役皆復舉辦團勇頗著聲勢焉夫所謂洋鎗隊者

卷十四

三

同治元年兵部侍郎三口通商大臣崇厚以捻匪北趨由大沽協標六營官兵內選練五百名爲一營歷年增練分爲五營共兵丁二千五百設總統一翼長一每營管帶官一幫帶官二正副令官二帶隊官十分帶隊官二十每營分十隊每隊兵丁四十八內隊長一隊副一目兵二十隊兵額共四百八十又每營識字差兵二十以足五百名之數七年奏定薪水口分分別行坐支發所用器械均係帶刺來福洋鎗時以津郡海防緊要又募足洋礮隊一營歸天津鎮總兵陳濟清統帶其薪水口分馬乾公費衣帽等銀由海防支應局照章核發至

於練兵之議同治二年直隸總督劉長佑倡之於保定正定大名宣化天津各駐一軍無事勿弛有警則調其餘老弱者汰而不補病故者去而不募卽以所節之餉項量發歷年之欠款且議增置旗幟器械之屬以壯觀瞻直隸省綠營經常之制其變革蓋肇於此八年直隸總督曾國藩再議練軍事宜於古北口正定保定皆暫練千人而天津猶未之及十二年李鴻章督直隸以津郡洋鎗礮隊酌照直隸練軍步隊營制改設營哨俾與保定大名通永各軍聯絡一氣遂以現存兵勇編立四營三哨仍照舊制設立文武翼長各一藉資訓練所有

卷十四

四

弁兵薪糧公費柴草伙夫長夫等項均照曾國藩奏定練軍章程核給其從前洋馬大馬暨選練馬隊留津京營官弁總統隨帶文武員弁人等並鎗礮公費一併刪除而津防爲京師門戶常以淮軍駐小站厥初周盛傳周盛波統之咸深得士心兼師西法計馬步軍十六營周氏昆季旣沒乃以衛汝貴統其軍光緒十一年復創設武備學堂於天津挑選各營精健聰穎略通文義之兵弁入堂肄習兵法於是人才滋眾及庚子之難天津鎮標大沽六營多傷亡損佚遂行裁撤二十八年袁世凱督直隸乃募練常備新軍卽順直賑捐結存項下撥

款一百萬兩暫作新軍餉需派員分赴正定大名等處會同各地方官按屬輪派精選壯丁六千人兵必合格人必土著應募之後按名註冊交地方官分存備案以便稽考并分餉以贍其家屬計畝以免其差徭顯示體恤之心隱厲防維之意且免市井游惰之風其後益裁節綠營兵餉以贍新軍三十年後兵權集於中央陸軍皆直隸於陸軍部裁撤綠營改編巡防其屬督撫節制者僅巡防營而已先是天津有武備學堂之設嗣經變停廢袁世凱督直隸遂建立北洋陸軍武備學堂光緒三十二年建立電信學隊是年復立憲兵學堂規制漸備矣宣統三年陳夔龍督直隸是時陸軍第二第四兩鎮暫歸北洋訓練者統歸部直接管轄夔龍另編成陸軍混成協設直隸督練公所參議官與各直省同一制焉遵裁綠營官弁兵餉以濟混成協之需而天津綠營經制現存兵額蓋罕有存焉者矣

水師 海軍

清初雍正四年因滿洲兵丁向未習水師設天津水師營駐天津海口蘆家嘴凡都統一協領四佐領二十四防禦二十四驍騎校二十四皆滿員也又協領二佐領八防禦八驍騎校八爲蒙古人領催前鋒甲兵二千名

礮守一百四十四名馬二百匹每歲應支俸餉馬乾等銀截漕支給又總領教習一教習官十六水手正舵工正繚手正旋手正阿班正舢班副舵工副繚手副旋手副阿班副舢班各三十二共水手三百二十每歲支俸薪工食等銀亦截漕支給乾隆三十二年以水師營防海口今海面久已安謐將駐防各兵移撥他省所有水師營員額悉裁此外有天津河標營爲雍正八年立其左營凡副將一中軍都司一千總二把總三馬兵一百一十三守兵四百四十一右營凡游擊一中軍守備一千總一把總五馬兵八十守兵二百七十二河營爲防

卷十四

六

河而設是與水師不同自乾隆閒裁撤水師而後嘉慶二十一年奉諭大沽等海口直達外洋從前曾設水師駐防後經裁撤該處拱衛神京東接陪都形勢緊要自應參考舊制復設水師著大學士等議奏二十二年大學士等議天津添設水師分左右兩營歸天津鎮總兵統轄奉諭天津鎮專管陸路未能兼顧著增設天津水師總兵一員以專責成道光元年復奉諭裁水師營缺咸豐乙未庚申之際英法諸國聯艦至渤海直隸總督瑞麟奏請復設天津水師奉旨著僧格林沁慶祺會議抽百貨釐金助餉經營海口終一蹶弗振及同治末諸

國皆在津通商外事愈亟國家迭以曾國藩李鴻章督直隸國藩未久去職鴻章蒞津設建水師之議倡于同治末年及光緒初元鴻章設水師營於三岔河口復於戶部撥給各關洋稅銀訂購鐵甲艦此北洋海軍之所由始也光緒二年購得龍驤虎威其後逐年續購礮艦鎮北鎮南鎮東鎮西等以資號召并蚊船鐵甲等件并建造船塢于大沽海口七年又定購巡海快船兼碰船二隻一曰超勇一曰揚威由是北洋聲威遠屆海上矣時識者以天津屏蔽京師而旅順威海實繫帶左右乃以旅順爲水師屯練之所而擢記名提督丁汝昌統其

卷十四

七

軍其後益續購銅面鐵甲穹面鋼甲快船并設水師學堂于天津歷年經營海防復治大沽北塘礮臺以固隩區更築新城以爲後拒其海防經費由各省關稅協濟購器築臺規模遠拓然事在經始未備者多光緒甲午中日朝鮮之役我海軍燿焉迨庚子之難諸國聯軍入大沽羅榮光不能抵禦礮臺遂失議和後不得修復海上遂無險可守矣

警察一 緣起

光緒閒天津行保甲分設段落曰守望局俗曰鄉甲局其制採取成法奉行故事而已庚子後津邑初復人心

易動且是時與各國結約有離津二十里屯駐軍隊之議袁世凱既督直隸于光緒二十八年四月興辦保定巡警復以天津地處海濱民俗强悍兵火之後人心浮囂伏莽尤多且海口一帶商旅駢集海盜出沒靡常蒞任之初卽預籌收回津地第恐華洋交替之際匪徒乘閒思逞非設巡警無以綏靖地方乃招募三千名編列十局於二十八年六月閒成隊而暫駐保定及津地收回世凱以新練軍兩營改編巡警駐金綱橋迤北是之謂北段巡警局復派巡警一千五百名來津駐紮設總局于東門外濱河地方是之謂南段巡警局南段管轄

卷十四

八

金綱橋迤南以趙秉鈞爲總辦其經費則以裁併津防練軍餉項移撥後世凱又以各處巡警事屬草創且期在速成亦祇粗具規模欲其精益求精非設學堂不足以資擴展遂于二十八年冬在津設立警察學堂飭令各巡局官弁兵丁分班肄業延訂洋員充當教習編譯外國警察諸書立定課程爲之講貫俾一兵一弁皆由訓練而成三十一年七月世凱復奏設天津四鄉巡警而天津巡警總局總辦趙秉鈞擬定章程十二條曰劃區域曰挑巡警曰教功課曰查戶口曰重巡邏曰慎防查曰防災害曰維風化曰聯紳董曰備器械曰定權限

日明賞罰其經費以地方原有之青苗會支更費及賽會演戲一切無益有餘之款酌提充用視村莊之大小定警兵之多寡殷富之區按五十戶出一荒僻之區按百戶出一初次清查四鄉共有七萬五千四百七十八戶巡警則七百二十有四月餉由村董酌定支給而官不與其事其總分局區官弁薪工馬匹雜支月需銀咸由官發給逮宣統間楊士驥總督直隸以巡警學堂初設時值需才孔亟本用速成教法高等學生一年畢業普通學六月畢業卽以學資之高下派充各廳州縣教員巡官區長等差而至是畢業學生已七百六十餘名

卷十四

九

派赴各州縣者已可敷用卽飭寬定學期俾資深造遂于省城天津各學堂增設完全高等警察一班定期四年畢業自是天津之警察乃日臻美備矣宣統三年三月直隸總督陳夔龍復增募北段巡警一營常年經費由運庫支領

警察二 編置

北段設總局一分局四第一局設一隊二隊第二局設三隊四隊第三局設五隊六隊第四局設七隊八隊南段設總局一分局五第一局分設四區第二局分設四區第三局分設四區第四局分設四區第五局分設四

區其四鄉按東西南北分四路每一路設一局東局劃爲三區西局南局北局各劃爲兩區海河一帶斜迤東南至大沽口止分爲四段每一段設一局第一局毗連租界別劃一區第二局分設三區第三局分設二區小站則爲第四局總計八局十五區南北各設總辦復以督辦統之宣統閒設巡警道督辦總辦之名裁撤一以巡警道統轄之廢除南北段重劃爲五大區以區長區副分理之東區警察署東至金湯橋西岸沿河馬路南至南營牆西至鼓樓南大街東面胡同內北至金綱橋新浮橋大街設分駐所六南區警察署東至鼓樓南北

卷十四

十

大街南至南牆子河西至西營門北至北門迤西北馬路設分駐所五中區警察署東至單街子西口南至北馬路北面西至西營門北至北運河營門設分駐所五西區警察署東至北運河南至金綱橋西至蓆場村北至公園設分駐所六北區警察署東至土圍牆南至京奉鐵路西至河東十字街北至旱河設分駐所六此天津巡警之概略也未設巡警道之前工程局捐務局探訪局均屬特設局所嗣後歸巡警道統轄改爲工程科捐務科探訪局則改偵緝隊他如禁煙防疫亦巡警範圍內事也光緒三十二年設禁煙局宣統二年設防疫

局事屬創辦其初則皆自設一局也警察所轄更有消防隊河巡隊

軍械製造局

天津機器局經始於同治六年訖光緒二年凡十稔庀工度器積材儲械之所規模於是大備初在城東十八里曰賈家沽道者得田二十二頃有奇釐爲局基環西南北皆民疇東界小河而止厥後踰河而東拓地四頃其三隅拓地七頃畫爲牆址內墉外濠崇雉屹若延袤千有五百餘丈其間巨棟層櫺廣場列廠城堞礮臺之制井渠屋舍之觀與天津城遙遙相峙隱然海疆一要

卷十四

十一

地焉局初創於北洋通商大臣崇厚會崇厚奉使海外李鴻章以直隸總督駐節天津知此局爲當時之急務乃具奏略云竊查製器與練兵相爲表裏練兵而不得其器則兵爲無用製器而不得其人則器必無成西洋軍火日新月異不惜工費而精力獨絕故能橫行於數萬里之外中國若不認真取法終無由以自強臣自愧智短力分迄無成就前在江蘇督撫任內創設上海金陵機器兩局分造輪船鎗礮火箭銅帽等件略有端緒歷年軍中撥用實利賴之惟馳驅在外未能躬親督率嘗以有初鮮終爲懼洋鎗炸礮皆非洋火藥施放不能

取準而及遠臣軍每向西國購運其價較中國土藥微昂究不若自製洋藥之多且便總理衙門奏令崇厚在津購辦機器設局造藥足補南局所未備且隱寓防患固本之意極爲遠慮深謀其初不得不雇洋人指授所望內地員匠學其器而精通其意久之自能運用轉相傳習乃爲經久之道奏上奉旨允行鴻章由是遴員領局節次規建擴其舊而增其新天津之有機器局自此始初僅一局在城東賈家沽名爲東局分造洋火藥銅帽鎗礮各式子彈水雷等項其後增設城南海光寺名爲西局分造軍用西洋器具添配雜項物件兼造開花

卷十四

三

子彈等項計崇厚凡爲機器廠者一火藥廠者八銅帽廠者二又分局於城南海光寺爲鐵廠者一廠一而事入比屋而棲各從其類其他治事之廨休匠之舍西洋工師之居凡三百楹爲公所者二爲庫者五時則德椿主之庚午沈保靖來主局事益碾藥爲四廠撤海光寺分局而別爲鑄鐵廠一錘鐵廠一鋸木廠一機器又別爲新廠而移其舊爲洋鎗廠吳贊誠至局復折銅帽廠爲鎗子廠而別爲藥餅廠一鏹水廠一又擇蒲口地爲三藥庫劉汝翼繼主局事始爲牆濠俾有藩衛又於銅帽廠之南爲捲銅廠河之東隅別爲電氣水雷局局設

凡廿餘年當事者咸殫力經營次第開拓及庚子之役東南兩局燬於兵火遂鞠爲茂草掃地無存光緒二十七年直隸總督袁世凱復設製造局於山東德州城外楊士驥繼之凡建造十二廠曰鎗子廠新鎗子廠其餘坵屬各品分爲十廠曰機器廠捲銅廠無煙藥廠棉藥廠鋸水廠淋硝廠木樣廠鍋鑪廠鑄鐵廠熟鐵廠其部署有條北洋軍械廠藉此以繼其後也

天津政俗沿革記卷十四終